

惟清齋全集

梅庵詩鈔卷之一目錄

玉門詩鈔

登天山小憩

出關作

車中口占

登智珠山

戲題及門笪繩齋山水障子

次及門阮中丞寄懷元韻

卽事

砥齋廉使新闢小圃詩以記事

閒居效放翁體

對殘花作

憶舊遊詩十二首

冰壺坂

樹窩

戈壁

不寐

猗寧雜詩

丙子初度日長律却寄

既作卡浪圭異石記又綴長律二首

示元兒

獨客二首

庚午除夕感懷二首

書懷二首

娉娜曲

同人  
舞名

寂寂

書懷二首

四憶詩

卷之二目錄

人日偶成

烏什道中望雪山作

葉爾羌道中

阿克蘇城被水馳往勾當紀事

暑日夜行示同人

長制軍起官河南巡撫喜賦

回俗過年日口占

題三仙洞

感懷

壬申正月十四初度日偶成

題敬齋方伯所藏明人戶口冊詩卷并序

雪窗與敬齋方伯夜話

初度前一日書到得孫詩以誌喜

游三仙洞

柳泉詞

春日

放歌行

春日感懷

巡閱卡倫

同部

醉歌行

見家書作

徠寧有燒似梅三無香實更酸於梅詩以紀之  
回地見牡丹作二絕呈敬齋方伯

詠懷

立夏日作

戲題自編年譜後

與友人書示八齋中雜咏分得四首

雜詠

雜詠

澆書

捫蝨

次敬齋方伯韻卽以留別

玉關行

試馬行

見新月

旅夜

將歸作

歸期已定喜作

留別敬齋方伯

九日小獵



又成一律

讀借綠軒三仲遺詩感賦

上恩湛庵撫軍

內子六十初度詩以寄之

附詩餘卷之一目錄

題畫天竹

後庭花

題畫紅梅

臨江仙

丙子歲除

滿庭芳

丙子冬夜

滿江紅

寄如亭夫人

滿庭芳

冬日遊北山作 滿江紅

夜坐書懷 沁園春

閨怨 滿庭芳

見家書作 念奴嬌

初度日作 水調歌頭

酬孫淑明夫人除夕作 意難忘

初度日遊北山作 臨江仙

題八女畫羅漢像 意難忘

題走馬燈 滿江紅

送元兒回京二首 菩薩蠻

題姬人撫琴小照 念奴嬌

題挹蘭姬人照 意難忘

江上作 柳含烟

蒔花 菩薩蠻

種花 減字木蘭花

自題江天閣小照 鳳凰臺上憶吹簫

首夏江上泛舟作 醉江月

寄內卽以代簡 雨中花慢第二調

詠懷 鳳凰臺上憶吹簫

聞思 偷聲木蘭花

夜風不寐

蝶戀花

約同人江上泛舟因風不果

唐多令

有約江上餞春因風雨改期翌日晴明書此識悔

醉春風

以瓦瓶貯野花戲題

風入松第一體

松峯哲嗣假滿回京書以廣之

鳳凰臺上憶吹簫

偶患目赤戲題

醉花陰

梅庵詩鈔

玉門詩鈔


登天山小憩

天山如天高我到天山頂萬笏峰怒排矗立兒孫等上  
有關侯祠小坐啜山茗雪花大如掌迎面若操槌茫茫  
長安道萬里秋烟迴

出關作

萬里巖疆事遠遊玉門關外此淹留塞山不及征夫健  
纔見秋風已白頭

長



車中口占

平原千里路茫茫積雪連天入大荒坦坦王程沙磧遠  
玉門關外有康莊

小住村寮落日昏飢驅百里下高原巴童報道午炊熟  
白割黃羊帶血吞

檢得山柴帶雪烘嚴風搜壁燭搖紅燒殘楫桡烟難盡  
身在黃梁雲霧中

孤村草草解征驂暫息塵勞苦亦甘忽聽塞垣懊惱曲  
曉風殘月憶江南

登智珠山

幽樓懷抱向誰開  
聯騎城東上翠隈  
獨客醉登危閣迴  
萬山氣擁大河來  
漸消積雪通冰壑  
指日春風破凍荄  
如此溪山容小住  
何人高唱紫雲迴

時有客吹笛

戲題及門笄繩齋山水障子

讀書萬卷破天根  
况復從遊到塞垣  
收拾山川奇氣足  
玉門關外畫崑崙

次及門阮中丞寄懷元韻

南雲迴首是他鄉  
身到輪臺客夢長  
猶憶去年三月半  
一江風雨泛沙棠

故園北望久離家  
况復金陵水一涯  
江外春風江上月

五年前已證空花

宦游十載別江鄉塞馬嘶風驛路長聞說淮塢薪似桂  
也應炊到舊甘棠

君謫蓬萊尙有家笑余襍被客天涯祁連山上春如海  
開到江南桃李花

卽事

嚴風四月冷添裘抱膝荒齋興亦幽捕壁野花標綽約  
掛簷山鳥叫勾輊閒翻曲譜收新調偶檢前詩憶舊游  
如此謫居消永晝更無心事綰離愁

正是南糧北上時那堪凌汛阻歸期當機不乏籌河術



挽運仍愁抵壩遲萬里臣心猶未竟

九重天眷豈終移

戊鳥城八月卽蒙  
恩授祿寧叅贊

夢迴獨對銀缸坐

手把青銅驗鬢絲

兀坐荒齋事事無此身合與古爲徒朝餐大嚼烹羊胾  
午夢纔醒弄鼠鬚每挹生徒成小集偶隨樵牧到山嶠  
旅懷不用人排解到處褒斜是坦途

更無心緒賦閒情百感忘來夢亦清詩好僕依蕭穎士

調高客遇柳耆卿

朱砥齋篋繩齋俱善詞學

爲消塵滓添書病不築

愁城廢酒兵興未頽唐身更健白頭猶作少年行

砥齋廉使新闢小圃詩以記事

土屋茅階闕草萊不須隙地起樓臺  
開窓但放青山入遲客先邀明月來  
到處生徒隨絳帳四時花鳥助深杯  
笑余台傍蓬萊住酒陣詞壇得暫陪

閒居效放翁體

頽唐老眼謝時髦鍵戶懸車興更豪  
欲却睡魔耽白戰爲醫臂痛挽烏號  
廢書我已忘孤癖健飯人應笑老饕  
如此溪山容小駐敢將身命等鴻毛

對殘花作

罌粟花開五色披輪臺佳種見應奇  
明年馬首知何處且對殘葩坐少時

憶舊遊詩十二首

余生於乾隆壬申忽忽周甲一事無成緬懷舊游都成陳跡偶

作小詩以識歲月情見乎詞矣

束髮事遠遊長歌渡易水拾級燕昭臺飛轡荆軻里少年重意氣自視乃無比瞥眼成顛翁名場春夢耳

昔登翠微峯嘯傲烟霞外探幽破雲竇引領發天籟招邀素心友奮筆爭狡獪默然讀舊詩無由續高會

奮履摘星坵探奇水雲洞七十二庵中處處烟霞供僧老伴虎棲松古和雲種故人不可見良遊與誰共

我來東鎮東一登醫巫閭萬壑勢盤鬱高峯插太虛昔年此構兵一戰通舟車山川靈異鍾萬古青有餘

我來山海關，目中有滄海。海外更無天，無從問真宰。老  
妻興更豪，先我據高塹。乃繪觀海圖，筆花耀精彩。  
金焦如雙丸，天風吹不去。峙立洪濤中，風雨變朝暮。手  
摹瘞鶴銘，足躡郭璞墓。興酣鼓棹歸，初月挂江樹。  
論文大江南，心醉溪山勝。出關叩棲霞，一慰壯遊興。載  
登最高峯，萬里江如鏡。長歌謝山靈，天外山谷應。  
馮夷知效順，海宴無獐波。我來吳淞口，籌海禦蛟鼉。水  
戰備舳艫，陸路排金戈。鯨鯢跋浪飛，無事慮么魔。  
萬峯如兒孫，環抱泰山足。我合天地觀，泰山亦一粟。人  
生如寄耳，胡爲自羈跼。舉頭天影低，茫茫看日浴。

天山本天然屹立自雄貴迴視吳越山都增脂粉氣嚴  
風搜敝裘積雪塞空翠小憩關侯祠征夫半顚顛  
出關如歸家計日到荒戍迴首關門關中原隔雲霧戈  
壁無人行軍臺容小住何時出關人重問大關路  
茫茫烏壘山派引崑崙墟梯雲發長嘯逸響動坤輿浮  
踪遍天下南北無長途白頭歸去來一補壯游圖

冰磴坂

巍巍冰磴坂積雪凍如鐵洪蒙開闢初此地人跡絕  
天王奮神武拓地到崑碣五丁天遣來峻嶺通車轍至  
今來往客無慮車輪折六月風雪寒窮陰氣凜冽勞勞

行役人南望猶咋舌

樹窩

亂樹結成窩天光不到地槎枒萬木攢誰能問深邃中  
爲虎兕藪沙上爪痕萃腥風動地來萬馬爲辟易行行  
天日昏引領亦心悸快哉野燒燐燎原等兒戲

戈壁

天荒地不毛碎石平如掃行行沙磧中千里無寸草狐  
兔遠遁藏旅販行踪少驀見鳥雀飛知已近村堡何能  
計里程晷影驗遲早

不寐

枯燈生冷燄兀坐夜如何久客忘家計衰年減睡魔  
癯颯穿壁急塞月入窻多六十年間事輪翻枕上過

徠寧雜詩

疏勒古雄國今爲沒齒臣衣冠仍異俗耕鑿等編民寒  
暑陰晴變山河壁壘新覃敷文教遠天地愛斯人  
清秘堂前客翻然萬里行行年入花甲

恩命應先庚久病踈鉛槧孤身治甲兵巖疆容坐鎮投  
筆笑書生

半壁西南地山川入大荒分茅盡回鶻通估到西洋久  
喜邊塵靖都忘驛路長建牙星宿海投老壯心償

阿渾談經處

同人經師謂之阿渾

黃童白叟環道標三教外風動

八城間士可操刑政民多類草菅

朝廷從欲治化外順愚頑

十月盤雕熟陰山好合圍風沙隨馬起毛血帶霜飛酒

釀蒲萄滑鮮烹雉兔肥醉餘齊罷獵山月照人歸

絕域夷風陋漸摩衆易從笙歌齊送日

每日中西時擊鼓誦經謂之送

日版鋪競澆冬

收穫後放水入田謂之澆冬

禽處忘頽俗蝸居儼素

封古來沙漠地無事講兵農

半鈎新月上又見一年春

同俗於九月初望見新月過年此日

踏歌者都成送歲人金珠爭耀首絨褐半章身鼓吹昇



平福遐荒民氣淳

七日日中市欣從把雜來

七日一市謂之把雜爾

中原貨爭積重

譯客無猜貿易聯西藏舟車洞入垓回疆真富庶烟戶

萃荒萊

女伎當筵出聯翩曳綺羅歌應翻俚曲舞欲效天魔髮

細垂香縷眉長補翠螺不堪通一語默坐笑婆娑

茂林環曲水身到伯斯塘

築土正方四面環水密植榆柳以爲憩息之所謂之伯斯

塘

天外雲陰合樽前塞草香低枝爭繫馬少婦笑窺牆

到處宜行旅應忘客路長

內子初度日長律却寄

齊眉老友敬如賓白首持家亦苦辛四十一番初度日  
萬三千里未歸人童年兒女離愁薄久客師生禮數真  
天眷未移身更健瓜期應卜艷陽春

翰林學士遠防邊花甲初週少一年身到玉關親士卒  
爭如瀛海作神仙鼠鬚偶試機猶澁羊胛頻吞味不羶  
馬上裁詩介眉壽苦無佳句寄華筵

既作卡浪圭異石記又綴長律二首

半生未舍三災石此日猶爲抱璞人憎說砮硃能混玉  
莫教砂礫更埋珍奇文迴出人工巧大雅方知造物神  
海岳庵中問米老賞心或恐不如臣

曾隨精衛填滄海未遇媧皇補碧天此日卡倫圭石貴  
不教疏勒國人傳地應愛寶藏幽壑我欲搜奇涉大川  
自笑歸裝無長物洞天一品作腰纏

示元兒

萬里文鯢到塞荒喜聞文戰已終場過庭我正懷曾點  
教字兒能繼阿章遇早莫希金馬貴學成人羨白眉良  
父書能讀真吾子生笑王孫寫弄聲

獨客二首

獨客戀孤枕燈昏夜氣迢老懷同伏櫪歸夢急傳郵幕  
府材官肅邊城畫角稠地高天亦近星斗挂簷頭

吟餘懷舊雨塞月入窗新坐數青雲客都成白髮人  
交疎書斷雁地遠德無鄰解意憐同鵲顓蒙意可親

庚午除夕感懷二首

臘尾春頭序又更一般守歲駐邊城身經患難閒愁少  
人到衰頽客感輕不必椒盤能獻歲暫拋斑管笑談兵  
明朝花甲初周日莫爲頽唐悞酒盟

又逢初度試燈前落拓名場六十年肘後應無醫老術  
囊中休問買山錢未除慧業難成佛再懺機心可證仙  
從古文章與經濟儒林傳有幾人傳

書懷二首

抱影空齋寂枯禪對令辰家書疎似夢天氣冷於人久  
客親詩卷閑官計俸緡出關頻度歲風景又從新  
老矣年華晚明朝花甲週功名成白首身事等浮鷗萬  
里巖疆重三春獨客愁瓜期應有待歸夢幾時休

嬌娜曲

同人  
舞名

崑崙迤西碣石北中有雄藩古疏勒國中女樂稱最奇  
意態翩翩勝巴僊當筵醉舞號嬌娜對對紅粧耀新飾  
低昂應節態婆娑翩若驚鴻曳雙翼齊眉翠黛入鬢長  
拖地青絲隨袖側曼音促節不可辨俯仰低徊那能識  
我會以意遇以神彷彿離人訴反仄夷人重譯嬌娜詞

座上聞之三嘆息江南江北此最多一曲纏頭無定則  
朝朝暮暮歌吹繁歲年年風月逼江上琵琶曲未終  
六朝金粉無顏色我聞娉娜聲嗚咽回首吳門隔西域  
歸來爲補娉娜詞懊惱聲中淚沾臆

寂寂

寂寂蕭齋靜荒衙坐冷瓊官閒書有債身健病無權久  
客疎鄉夢幽栖入老禪自慚香案吏投筆事防邊

書懷二首

珎筆韜弓出玉關周妻何肉累全刪夢依吳越江山外  
身到崑崙碣石間才斗不聞沙漠靜簿書常簡柳衙閒

白頭尙有登瀛福坐擁殘書伴老孱

華髮蕭騷事遠遊萬三千里此淹留乍依西域日中市  
親見黃河天上流兩路回夷分彼界八城將帥喜同舟  
半年謫宦超都護投老涓涯懼莫酬

四憶詩

余去江南歲又更矣感故  
懷人情不自己作四憶詩

我憶江南百姓家驚聞淮水又無涯盡拋舊業依茅舍  
爭上長堤卧淺沙幾見鰲田通舴艋誰從鉅浸問桑麻  
經年無補蒼生事迴首吳門感歲華

我憶江南僚佐繁官場聚散幾人存開樽未醉登樓月  
分袂誰攀出塞轅到處盡關

仁主慮幾人真雪兆民寃勉將能吏爲循吏好聽佳聲  
到塞垣

我憶江南山水奇畫圖影裡駐旌旂放衙客逐江雲散  
行部舟隨岸月移鍾阜勢消王氣息金焦影盡海潮低  
建牙五載金陵署贏得吟情老不疲

我憶江南風景和春花秋月等閒過蘭旂桂棹搖紅雨  
蟹舍魚莊趁綠莎一代奇文傳筆札六朝遺響剩笙歌  
竭來萬里窮荒地猶引閒情入睡魔



梅庵詩鈔

長白鐵保梅庵著

玉門詩鈔

人日偶成

六十流光等逝川又逢人日塞雲邊  
新春客况殊常日投老閒情勝少年  
萬里扶搖身似鶴一時揮洒筆如椽  
壯懷幸不頽唐甚身是瀛洲第一仙

垂老家居似異鄉不妨獨客駐遐荒  
偶懷舊雨如雲散不信新年比夜長  
關外師生酬令節閨中兒女話嚴疆  
賜環又擬初春後檢點殘詩貯客囊

烏什道中望雪山作

萬里祁連山一片太古雪此山以雪名乃爲衆山穴同  
紇昔構亂犬羊肆猖獗將軍天上來一掃機槍滅撻伐  
殲醜類赤地人烟絕乃移近境氓比戶事耕畷綿綿數  
十年孳養儼城闕安居聚樂土庶與別城埒山巔關侯  
祠云是亂後設威靈佐大軍指顧靖妖孽至今回鵲人  
語次猶咋舌我來重巡宣高山仰遺烈欲登千仞峯跬  
步愁跛躄

葉爾羌道中

萬里星輶到葉城深林密樹少人行驚沙障日雲陰黑

怒馬嘶風虎氣橫塞路枯槎埋故轍燎原野燒阻前旌  
長途里數無從問止計軍臺不計程

白草荒烟趁夕暉蕭蕭騶從馬如飛夜眠酣卧穹廬暖  
辰饌鮮烹狡兔肥深喜回民嫻禮數不應官吏昧心機  
此行無事推敲苦久矣

天心辨是非

時奉 旨赴  
葉爾羌審案

阿克蘇城被水馳往勾當紀事

我昔建節吳江邊日與陽侯爲比肩經年襁被駐袁浦  
黃水未退湖水連今茲遠謫疏勒地萬三千里馳風烟  
黃沙白草半戈壁幸無水患遭迍邐不圖五月雪水漲

極天駭浪奔巨川阿克蘇城被淹浸哀哉回戶家無椽  
城垣倉庫盡圯倒游商戍卒愁顛連我聞郵報束裝去  
銅鉦火傘相熬煎兼程十日到尙早災黎如望雲霓懸  
先散金錢作撫卹後蠲租稅拯市廛官衙兵舍工畢舉  
更築堤岸籌防宣以工代賑良法在稍喜編戶得安全  
飛章馳騎奏

天子

如傷懷抱慰乾乾嗟余每與水作難捍禦無術成播遷  
一城鴻雁得安堵聊藉此役彌前愆長歌再拜陽侯去  
莫更與我同周旋

暑日夜行示同人

秉燭真成萬里遊  
陰森夜氣冷如秋  
長途酣臥車爲屋  
絕壑孤攀虎作儔  
半濕葦塘多野燒  
無邊沙磧沒前驍  
此行免受炎蒸苦  
白日郵亭許暫留

長制軍起官河南巡撫喜賦

總制西南若比隣  
笑君先我逐邊塵  
出關路作入關路  
失馬人爲得馬人  
回紇山川題已徧  
汴梁風土治從新  
一般謫宦叨

恩遇望著歸鞭及早春

回俗過年日口占

紀期三百六十日每到秋來歲籥新未必黃楊能計閏  
不須綵仗更迎春爭看初月如鉤上不覺流光似水頻  
我到履端酬令節一年人是兩年人

題三仙洞

洞天七十二是處標靈異咄哉此仙人乃棲回鶻地不  
知何代人鶴馭等游戲遺像遭摧殘無從問詭祕中繪  
狄武襄威靈尙昌熾野史半穿鑿是非兩姑置仙人去  
不返古洞迷空翠西望崑崙邱何能探幽邃

感懷

獨夜寒天擁敝裘半生心事五更頭已諳世故貧非病

未報

君恩老不休幾見籌邊推學士敢將禦寇美通侯卽今

少宰叨

恩命歸去藤廳話舊遊

余通籍之初觀政吏部後曾兩任吏部侍郎今復承

三典銓

曹矣

壬申正月十四初度日偶成

又逢初度泛流霞六十光陰手一叉三典銓曹推舊尹  
再叨

恩廕起儒家行踪欲擬歸巢燕歲月真如赴壑蛇指日  
瓜期三月半朝衣香染上林花

題敬齋方伯所藏明人戶口冊詩卷并序

作書如人

自然流行不假修飾爲妙所謂羚羊挂角無跡可求是也此卷錄同時人詩文畧不經意而自然流利以趙松雪風神參以倪雲林蕭疎書卷之氣盎然紙面又不著書人名字而自能不朽此其所以傳也宋榻聖教序以戶口冊爲之此卷亦用冊紙豈彼時紙貴或竟以此紙爲佳耶余自己巳七月赴戍久不見古人名蹟今得遇此卷又與敬齋舊雨同官祿寧論詩評書何幸得此率題長律以識年月

不知何處戶口冊寫作先生紙背書喜見新詩收篋笥  
忍教殘籍沒抄胥書成不屑留名字筆潤無須辨魯魚  
好事之江老方伯裝潢攜伴使臣車

雪窗與敬齋方伯夜話



雪花如掌筆如椽快論驚人掃舊編廿一史從何處說  
大千世許幾人傳了無綺語消長夜猶有閒情勝少年  
莫笑東坡能說鬼聊據奇想塞雲邊

初度前一日書到得孫詩以誌喜

六十一翁聞抱孫書隨征雁到崑崙了添蘭譜增家慶  
廕補銓曹叩

主恩喜見書香承世業敢期駟馬大吾門好音怡報稱  
觴日先試含飴酒一罇

游三仙洞

七十二洞天無地容卓錫乃竄疏勒西鑿空依岩壁疑

古謫仙人逃名遁空寂山荒雲不棲石碎沙如激危梯  
高百仞欲上心轉惕仙人不可見仙洞此親歷謫宦如  
謫仙嗒然竟誰適

柳泉詞

傳有同婦不爲強暴所污淚滴柳下遂化爲泉從樹孔出同婦秉貞度越千古是可

記也作柳泉詞

妾心清如泉妾命薄於柳泉清濯柳根弱質自長久  
瘴飈摧柳枝柳折泉不竭滴滴大路傍中有嫠婦血  
或化鴛鴦塚或作精衛石淚盡泉不枯泉清心逾赤  
回婦知守身精誠化清瀨採風經柳泉誰能斥化外

解一解二解三解四

春日

輕陰薄靄柳毵毵小園春深午夢酣行到溪山最佳處  
杏花時節憶江南

久客逢春不見春春來又作送春人  
墻頭紅杏溪邊柳且爲春風駐一旬

### 放歌行

驚飈爲輪雲爲旂出門大笑窮攀躋  
章亥有步不能測凌虛飛躡崑崙崙  
西遇浮邱子攜我直上萬仞縹緲青  
雲梯走眼盡八荒俯首瞰四夷八荒四  
夷小如粟向誤芥子爲須彌江海等勺  
水秦岱如丸泥舉頭天日近側身雲霧  
低吁嗟乎古來蠻觸鬪蚊睫朝爲吳越  
暮

楚齊六經菱菱剩糟粕二十一史全無稽劃然發長嘯  
巨響訇岩谿青天高尺五吐氣成虹霓十洲三島羅眼  
底瓊樓玉闕鳴天雞歸來爲補壯游事茫茫春夢無端  
倪

春日感懷

銜杯坐對落花風欲寫閒愁句不工小友半登點鬼簿  
餘生合作信天翁悶邀舊雨嬉荒圃老作新詩寄塞鴻  
歸去春明頭已白一燈兒女笑癡聾

巡閱卡倫

譯言柵也沿邊設柵每處築小城設侍衛一兵四十以稽出入

天險分中外邊城斥堠齊

一王嚴控馭萬國競輪蹄拓地烏斯北屯軍碣石西時  
平閒戍卒出入總編黎

不涉巖疆遠誰知天地寬我來萬千里西望路漫漫言  
語分諸國山河入大觀建牙疏勒外白首笑登壇

### 回部

聚族聯回部酣歌樂有餘衣冠同左衽文字任橫書  
屋居無榻荒田草不鋤問年惟記日歲月幾乘除

中國尊儒術西方重釋經地荒天亦遠人蠢俗無靈  
燕坐傳鴉片新粧飾雀翎誰能變夷俗化外樹儀型

### 醉歌行

天上有星地有泉人間乃有酒中仙  
頽然一醉天地黑前有千古後萬年  
有時爲書淫有時爲詩顛六經中辨  
僞文字千載上友真聖賢彭祖夭顏子  
壽人能不死天無權海上有三山飄渺  
乘飛烟天風吹我云側身崑崙巔飢餐  
流霞渴飲露何如大嚼吞腥羶我無酒  
量得酒趣飲少輒醉王公前安得坐覓  
不醉藥飲如巨壑奔長川手挽天河勸  
明月超然我與汝周旋

見家書作

不見家書來紙懷爲撩亂家書到面前  
疑信又參半滿紙報平安一字無點竄  
顛倒再三讀拭目自披玩無字

是真經文從空處看

徠寧有樹似梅而無香實更酸於梅詩以紀之

三月山梅發瓊英綴遠揚花時能見月開處不聞香索  
笑人難覓調羹味更長不須勞驛使佳種徧西荒

回地見牡丹喜作二絕呈敬齋方伯

牡丹花久冠羣芳驀對奇英喜欲狂珍重好花如好友  
同隨征雁到巖疆

萬三千里路湯湯誰向邊庭種牡丹始信此花真富貴  
不同羣卉避荒寒

詠懷

儂青妃白老居諸萬里防邊興自如對客頻臨爭座帖  
背人閒玩絕交書譏彈史事神猶王檢點名心習未除  
詔已許歸歸未得羸軀仍戀使臣車

周妻何肉累全拋指日清和序又交將老游蜂猶釀蜜  
甦歸新燕也營巢殘書欲試毫先禿古調微彈柱已膠  
歸去春明笑老醜塞風吹雪上眉梢

立夏日作

清和時節坐官衙人去閒庭靜不譁故壘仍延前度燕  
瓦盆先種隔年花山搜異石都成研柳剪新梢可當茶  
羸得閒心消永晝歸鞭休問客途賒



戲題自編年譜後

榮落名場六十春，不生歡喜不生嗔。  
編成幾卷冬烘傳，留贈他年諛墓人。

與同人擬元人齋中雜咏分得四首

攤飯

飽饜四紅飯，高眠八寶床。  
晨炊消白粲，午夢熟黃粱。  
功欲侔行食，心應等坐忘。  
老饕人亦笑，匿影黑甜鄉。

搔背

安得麻姑爪，頻從癢處搔。  
珊珊通骨節，欸欸散風騷。  
危坐脊難監，低吟神愈豪。  
羸軀僵已慣，纖手不須勞。

澆書

經年誇腹笥冥索笑腸枯靈液一瓢潤丹田萬卷蘇愁  
城看破壘詞陣壯操觚醉後狂歌發誰能問酒徒

捫蝨

落落古今事雄談氣絕倫禪中時見蝨座上久無賓奇  
癢搔應遍冥搜指有神微髭難托足合伴相公身

次敬齋方伯韻卽以留別

不須再寄隴頭梅塞馬輕隨旅雁回送客青山催夢去  
著花老樹殿春開頽唐我豈逢時器卓犖君真曠世才  
堪笑玉門關外路幾人歸去幾人來

# 玉關行

玉門關上人如螳玉門關外平如砥丈夫不出玉門關  
笑殺關中兒女子黃沙白草天茫茫南北兩路通窮荒  
伊江烏壘儼都會規模壯滿天一方我生作客戍紅廟  
烏魯木齊俗名紅廟八月欣承

賜環詔移節南來疏勒城萬里回疆握衝要翰林叅贊  
從古無書生坐鎮操兵符生憎倚馬稱佳士始信雕蟲  
不壯夫卽今遠釋邊陲寄歸伴山公同啓事揚鞭笑入  
玉門關白頭差遂四方志

## 試馬行

春郊十里平如掌細草蒙茸雜榛莽洼池天馬天上來  
駿骨崢嶸氣骭體材官超乘據馬背振策騰驤來復往  
鼻端出火耳生風矯若游龍戲洪漋古來名馬出西域  
千金市駿誰知賞九方不遇支遁死下與駑駘同厮養  
不應更生回鶻地受盡鞭箠老邊壤那如負鹽上太行  
血汗淋漓駕輪輞我對此馬三嘆息自顧年來馬齒長  
騎汝歸入金馬門長嘶更作追風想

見新月

同人三百六十日後見新月  
爲一年作見新月詞以記之

三百六十日如駛以月占歲歲云始閏中禮拜心最誠  
拜罷開齋啜甘旨喧呼徹夜如雷霆舉酒酌月月不醒

歌聲嗚嗚鼓聲咽男女醉臥全忘形一年一度月光好  
如此良宵敢草草我欲喝月使倒行今歲紅顏明歲老

旅夜

孤燈耿短檠兀坐覺寒侵風急星芒閃天低夜氣沈乍  
閒忘遠宦久客動歸心屈指端陽後刀環馬上吟

將歸作

早作還朝想行期總未真長途疑遠雁久客妬歸人好  
趁西風去都忘驛路辛重陽風雨近兒女笑言親

歸期已定喜作

瓜期已卜菊花天又見荷開未著鞭屈指歸時當九月

計程關外已三年  
羌人解作攀轅話  
異域都成涉世緣  
歸去題糕逢令節  
細陳客況夜燈前

留別敬齋方伯

巖疆萬里禦羌戎  
始信浮踪似轉蓬  
人事漫嗟憂悔吝  
天涯休問馬牛風  
于今遠畧資籌筆  
此後新詩託塞鴻  
萍水逢君應有日  
不須馬首悵西東

九日小獵

巖疆不負登高約  
白髮猶存見獵心  
萬里山川供遠眺  
一城風雨助孤吟  
安驅網已開三面  
詭遇人難獲十禽  
却笑書生籬菊畔  
題糕無句覓知音

又成一律

重陽事小獵短後御征衣怒馬翔雲入飢鷹貼草飛塞  
風吹絮帽原樹掛斜暉他日題糕詠陰山紀合圍

讀借綠軒三仲遺詩感賦

我讀三仲詩文情競雙美聯翩赴玉京同作修文使文  
齊福不齊才人類如此動我鵲鴿情雁行慟莫比藹藹  
石經堂聯床業書史庭槐結雙芝出爲兩學士高吟九  
列間生徒半金紫胡駕青虬去年纔強仕耳遺詩漸零  
落久恐沒泥滓逸想隨飄風壯懷付流水衰年無弟兄  
孑然守荒壘子由不可見老眼看猶子讀詩卷未終淚

落已滿紙

上恩湛庵撫軍

余謫戍輪臺路出洛下首見撫軍不知卽三年後替人也事之巧合

如此詩以紀之

遷客初經洛下春喜逢舊雨述邊塵誰知一夕酒酣語  
已結三年瓜代因吏部我爲三度客回疆君是再來人  
節麾指日辭荒傲歸去春明作主賓

丙子六十初度詩以寄之

十七君子歸余年才十九乙夜警雞鳴刀尺不離手隨  
余學小詩佔畢儼閨友同博堂上歡承顏賴新婦二十  
回京師持家事井曰郎官計俸緡淡薄饜羶韭中年飭



閨訓兒女隨阿母向平家事繁婚嫁兩不苟茫茫歲月  
遷相對驚老醜昔爲及笄人今隨白髮叟我逾花甲期  
君亦週甲侯相看髻若絲莫問印如斗去年蒙

詔歸瓜代一年久歲杪整歸鞭相見暮春後羸軀尙矍  
鑠自顧異衰朽想君高曠懷強健勝蒲柳歸時介眉壽  
舉案誇白首酣嬉兒女前一醉蟠桃酒

跋

梅庵先生以碩德重望出鎮疏勒撫馭餘閑寄情歌咏著玉門詩鈔二卷經濟識力以及忠愛慈惠之誠於是乎在非如昔人塞下諸曲僅備饒歌一體也時余以先生舊屬協贊祿寧間亦勉相倡酬以誌同聲之應壬申冬先生以少宰還

朝余亦拜直臬

恩命既歸請其稿爲付剞劂先生一代宗匠詩集遍海內豈借茲刻傳余以末學幸得附名卷末欲藉先生之詩傳耳至於事異題襟集非倡和余元倡和

作概不附錄事有體例非徒藏拙已也慶格跋

玉門詩鈔 先生于役輪臺及總制西域之作也時  
概負笈從遊受命編次 先生論詩以真意爲宗舊  
刻梅庵詩鈔六卷傳遍海內近作另闢一格情隨事  
遷亦自寫其真境而已 先生自記以老自嘲 概竊  
謂 先生總督兩江時籌海防河心力交瘁齒危目  
昏不敢言老今以邊陲務簡汙可小憇齒之搖者復  
堅目之昏者復明裁決庶務敏速周至勝少年十倍  
以故邊風不驚塞草咸靡得以餘興希踪風雅是  
先生不老然自通籍以來敷歷中外四十餘年

國計民生洞達諳練無出其右方今元老舍 先生

其誰如欲以庾信文章老恐

聖天子與天下蒼生所不許也

樞

門下士於

先生

之詩何敢贊一詞謹以復於

先生者綴諸簡末受

業

宜立樞

謹跋

梅庵詩鈔

長白鐵保梅庵著

附詩餘

題畫天竹

後庭花

萬顆緋珠一枝冷玉春風飛到簷  
簷谷蕭蕭翠影自臨風也拋紅豆傳心曲  
淇園久擅風流每食不妨無肉  
嬌紅姹紫界破琅玕局貞幹本蕭疎紅顏空撲簌

題畫紅梅

臨江仙

一夜春風吹絳雪嬌紅醉到梅花胭脂買得寫寒葩  
穠桃與艷李顧影不爭差換得水肌藏玉骨一天紅雨

交加孤山處士謝繁華巡簷堪索笑合付野人家

丙子歲除

滿庭芳

土鼓迎春椒盤薦歲客中緊閉柴門高燒銀燭兀坐對  
清罇回首故園風景小兒女笑語紛紛燈月下藏鉤射  
覆畫閣麝蘭薰 休論想人世悲歡離合幻若浮雲况  
喜得佳兒娛我朝昏指日賜環歸去草堂上閒課兒孫  
逢佳節開懷一笑往事付斜曛

丙子冬夜

滿江紅

剔盡殘燈聽不徹漏聲千疊况年華已晚歲籌又掣爆  
竹聲中塵夢杳椒盤座上鄉音別笑浮生六十六春光

輕輕擎 思往事愁千結吳江水玉門雪笑車塵帆影  
飄零胡越不問年華餘幾日斷腸仍對關山月總閨年  
閨月數歸期頭顱白

寄如亭夫人

蒲庭芳

葭管灰飛璇璣鑰轉峭寒天氣宜人冰山雪海絕域也  
逢春恰喜元暉來省燈月下笑語相親博得個父書能  
讀司馬大吾門 歡欣想此日夫人閣下兒女成羣况  
老病全瘥瘦骨嶙峋幾筆顛張狂素草堂上潑墨如雲  
待歸去白頭舉案同醉合歡樽

冬日遊北山作

滿江紅



苦雨淒風吹不冷壯遊心熱況溪山如畫萬峰攢雪枯  
木林中飛鳥散白雲天外陰霾結看層冰萬里卧長江  
堅如鐵憶當日馳旌節度瀚海超吳越舉名山大澤  
供吾游涉至竟奚囊無好句白頭怕對山靈說說不如  
歸去讀殘書休饒舌

夜坐書懷

沁園春

涼月窺人淒風射壁醫睡無方念半生行役東西南朔  
車塵帆影地遠天長宦海浮沈名場榮落甘苦於今我  
備嘗解組後喜中流返棹峻坂收韁幾時歸老家鄉  
揀數弓隙地草爲堂倩奚童扶曳芒鞋布襪科頭跣足

攤飯繩床白日如年青山似我一任先生自主張神定  
後破半天雲霧一枕黃梁

閨怨 滿庭芳

柳絮牽風梅英綻雪小院料峭春寒君之出矣又早艷  
陽天一任香消粉褪空搔首兩地風烟鴛枕上幾行珠  
淚唯有夢能傳 堪憐嘆今日蘼蕪香冷荳蔻花殘縱  
盼到歸鴻未卜刀環欲寫離愁寄去花牋上幽恨難宣  
關情處曉風殘月知伴阿誰邊

見家書作 念奴嬌

蠟梅香結悶沈沈又是艷陽時節三載家鄉無夢到止

有賓鴻來復槐蔭軒中虛閒堂上花柳依前發幾番開  
謝主人歸去是客盼到一紙家書千言萬語都是寬  
心訣也寫幾行和淚寄依樣葫蘆裁荅歧路艱辛僕夫  
況瘁兩字平安帖不須細問見時和汝細說

初度日作

水調歌頭

六十六初度能健又能閒古稀止欠三歲快樂慶餘年  
回首虛閒堂上多少嬌兒稚女聯袂畫堂前燈火娛清  
夜誰解憶長安掃荒徑關白屋坐青氈一杯濁醴愁  
魔驅盡醉鄉寬不問升沈榮落那有悲歡離合過眼等  
雲烟無酒堪成佛有酒便成仙

酬孫淑明夫人除夕作意難忘

甲煎香然正鈿車寶馬送歲迎年酒人陳栢葉食品薦  
椒盤燈影靜夜光寒隔巷漏聲殘笑羈人門無駟馬座  
擁青瑣 閨中喜接吟箋看移商換羽玉潤珠圓才多  
成古調心苦合閒官擊節賞續貂難欲寫興闌珊敢輕  
讓夫人城下獨步騷壇

初度日遊北山作臨江仙

六十六年初度日這回花樣新翻溪山重結再生緣烟  
霞供攬轡猿鳥勸加餐 爲說人生行樂耳不知今夕  
何年村醪一酌解朱顏忘機真壽考無事小神仙

題八女珍莊畫羅漢像

意難忘

坐破蒲團悟三生幻夢一指枯禪談空閒塵尾性定釋  
瑤編參同契悟真篇與蹟幾人傳笑閨中垂髫弱女解  
貌金仙年來客況迍邰奈息肩有地證果無緣形骸  
同土木魂夢託魚鳶天外事意中山相對總忘筌驗幾  
度電光石火滄海桑田

題走馬燈

滿江紅

天馬行空任萬里追風嘶雪看法輪高轉玉繩低掣寶  
炬光中沙磧滿碧紗籠內烟塵絕不終朝旋轉萬千迴  
無休歇嘆此馬筋力竭堪飲櫪成嚼櫪甘捕風捉影

消磨歲月待得夜闌拋蠟淚無人更問千金骨幸臨崖  
顧影早收韁全驚劣

送元兒回京二首

菩薩蠻

一年一涉遼東路今年更喜逢初度乍見彩衣斑慰余  
形影單 膝前能幾日布穀催歸急離緒又縈懷不如  
他不來

幾番欲把歸期展歸期展盡愁難遣莫再展歸期別離  
同此時 鳴騶容易發兩地關山月關月照征衣心隨  
關月西

題姪人撫琴小照

念奴嬌

天空雲潔撫玉軫彈出一輪明月萬斛閒愁無處寫只  
有焦桐堪託賓雁難憑伯勞飛去頓使鵲絃咽幾番腸  
斷陽關唱到三疊想見翠黛含顰一彈再鼓總是傷  
離別欲譜新聲成別調縷縷幽懷難說錦瑟佳人白頭  
遣客從古心淒切情絲剗斷世間幾個豪傑

題挹蘭姬人照

意難忘

戲折幽蘭是花如人瘦人似花妍露沾紅袖濕春映玉  
蕊寒攜芳澤對朱顏斜插鬢雲邊抵多少脂酣粉膩紫  
姍紅嫣老來春意闌珊况烟霞興遠風月情捐花開  
能幾日人別又三年花間集麗情編綺語盡從刪待歸

去燦花妙舌同證枯禪

江上作

柳含烟

青青柳日三眠嬾嬾隨風無力離愁散作夕陽烟有誰  
憐 邂逅閒依垂釣客不許行人亂折他時歸憶釣魚  
船嫩江邊

蒔花

菩薩蠻

一犁好趁黃昏雨荒園手種花如許生怕數歸期正當  
花盛時 種花花事急鎮日花前立鴉嘴自攜將笑余  
無事忙

種花

減字木蘭花



幾番春信且種閒花消客悶莫植黃華不到花開客到家  
種花時節花未開時先賞葉憑仗東風舊畝梢頭  
漸露紅

自題江天閣小照

鳳皇臺上憶吹簫

布被青鞋亂頭粗服阿誰貌此衰翁似東海漁人金門  
羽客偶御雲車游戲西風緊吹落鴻濛權作個玉皇仙  
吏小謫遼東欣逢嫩江如練千萬里閱盡無限英雄  
更奇峯如笏環匝蛟宮坐對名山大澤開拓我千古心  
胸待歸去披圖細認此老畸蹤

首夏江上泛舟作

醉江月

杏花初放瞥眼間又過艷陽時節首夏清和趣佳日也  
逐遊驄蹀躞山翠迎人江濤拍岸到處堪遊涉布颿挂  
日壯懷暫託舟楫有客對酒能歌扣舷先唱出曉風  
殘月鐵板江東讓老夫酣歌陽關三疊吸盡西江古人  
多少先我頭如雪及時行樂醉鄉端屬豪傑

寄內卽以代簡

雨中花慢第二調

閱盡三春明媚冰雪肝腸怕種花田南院數弓隙地半  
畝荒園春韭冬菘星羅棋布屋角籬邊勝嬌紅姹紫芳  
華易歇秀色難餐老夫耄矣詞壇酒陣嘯傲迴不如  
前小園內杖藜容我與我周旋一任人呼牛馬不妨自

樂魚鳶願君領取箇中况味娛我殘年

詠懷

鳳皇臺上憶吹簫

柳眼窺簾花光潑索索居無事經營笑鐵硯難穿錦毫  
易禿任我東塗西抹揮灑處電掣風行百忙裏非關好  
古不是求名飄零吉光片羽千百世汨沒無限英靈  
幸鬼神呵護落落晨星坐對鍾王顏柳品評盡唐宋元  
明真僥倖此中竊喜容我縱橫

閨思

偷聲木蘭花

梨花院落溶溶月又見天桃飛絳雪不語低頭怕引春  
風似我愁幾番花信催春老風雨無情春去早春有

歸期生恐春歸人不歸

夜風不寐

蝶戀花

一夜猗飈轟列缺布被生寒一穗燈明滅天外驚砂簷  
下鐵聲聲撼碎繩床月投老黑甜滋味別那更風聲  
又把驚魂掣坐聽寒雞聲斷絕此身儼化風中葉

約同人江上泛舟因風不果

唐多令

擬作泛槎游江頭買釣舟不隄防妒觸蚩尤一葉蒲帆  
愁不穩呼同伴且淹留湖海幾沈浮驚魂避淺流幸  
風濤斷纜才收縱使乘風能破浪終不似坐床頭

有約江上餞春因風雨改期翌日晴明書此識悔

醉春風

不識春歸處擬赴西郊路無端風雨阻良游駐駐寸  
草無心陽春有脚任他來去佳日真空過舊約誰能  
赴不堪重問釣魚舟悞悞悞江上青峯船頭明月笑人  
虛度

以瓦瓶貯野花戲題

風入松第一體

尋春偶到嫩江東野卉青蔥幾番開落無人問惜花勝  
友難逢唯有遊蜂戲蝶看他笑倚東風客居無物貯  
芳容土盎權供案頭幾卷殘書卷伴名花漢瓦商銅多  
少奇英異卉那堪步汝芳蹤

松峰哲嗣假滿回京書以廣之 鳳皇臺上憶吹簫

惆儻風流雍谷瀟灑少年氣宇崢嶸爲親聞來省飄零  
琴劍歷盡風飡雨宿無多日又返神京怕別後求魚問  
雁搖壞心旌 關情元暉去後孤館內也覺形影零仃  
藉蒔花藝卉磨硯揮藤閒約二三勝友江岸上鷗鷺爲  
盟堪持贈此中况味三載全經

偶患目赤戲題 醉花陰

人道青瞳如點漆笑我雙眸赤孤館坐無聊品畫看經  
悶煞孤吟客 千紅萬紫逢佳日不看真堪惜雲霧願  
全開布襪青鞋一覽江山碧